

Incumbensa Maissen concernent l'acceleraziun dal restabiliment duraivel da l'economia suenter corona

Sin fundament da sia structura economica è il chantun Grischun pertutgà en moda surproporziunala da las mesiras dal Cussegl federal per cumbatter la pandemia da corona. Grazia al fatg che la vaccinaziun cumplessiva da la populaziun progredescha e sin fundament da las experientschas cun autras pandemias vegn er questa pandemia ad esser passada insacura. In donn economic vegn dentant a restar, cunquai che las interpresas n'han strusch la forza per far investiziuns u perquai che la dumonda sa reducescha pervia d'ina recessiun. Er la vita culturala, che ha ina gronda impurtanza per il Grischun, vegn ad esser indeblida fermamain fin lura. Pervia da las midadas da cumportament (homeoffice, viagiari, niz e cunfins da la digitalisaziun) ed en consequenza da las enconuschientschas areguard la gestiun da crisas ed areguard la forza da resistenza pudess la pandemia effectuar a medem temp ina midada structurala en differents secturs. Questa chaschun vali da nizzegiar. Igl è impurtant da guardar gia ussa sur la fasa acuta ora vers l'avegnir.

Il chantun Grischun dispona gia d'ina paletta d'instruments da promoziun prospectivs en ils secturs innovaziun, svilup economic, svilup regional e cultura (NPR, occurrenz, alloschament, promoziun da la cultura, telefericas, infrastructures relevantas per il sistem e.u.v.). Quests instruments en per il solit colliads cun tariffas u cun summas da contribuziun maximalas, cun grondezzas minimalas dals projects u cun pretensiuns areguard ils agens meds finanzials. En temps economicamain normals pon quests criteris esser raschunavels per applitgar la promoziun cun cleras finamiras.

Sche quests criteris vegnissan schlucads durant in tschert temp, pudess quai gidar durant la fasa da la recessiun che interpresas investissan – malgrà reservas debblas – en l'avegnir e sviluppassan novs models da fatschenta sco er products ed offertas innovativas, che organisaziuns mettessan puspè en pe occurrenz grondas u ch'i naschessan novs formats culturals. I fiss in program d'impuls che sa basass sin instruments da promoziun e sin andaments enconuschents e che na stuess betg pir anc vegnir elavurà cun gronds sforzs, per ils quals nagin n'ha actualmain temp. Ina gronda part da quests criteris è reglada en ordinaziuns u en directives sin il stgalim dals departaments. Tals relaschs pon vegnir midads relativamain svelts. Ultra da las finamiras gia etablidass en la promoziun da l'economia duai la promoziun supplementara vegnir suttamessa al criteri ch'ills projects servian a la renovaziun ecologica persistenta, persequitond las finamiras da l'Accord da Paris davart il clima.

Las sutsegnadras ed ils sutsegnaders incumbenschan perquai la Regenza

1. da concepì tant pli svelts – per ina durada limitada da dus fin trais onns – en moda pli generusa ils criteris dals instruments da promoziun raschunavels che servan al restabiliment da l'economia e da la cultura e che sa chattan en la libertad d'agir da la Regenza u dals departaments, e quai cun la finamira da gidar che iniziativas e projects vegnian realisads pli svelts.
2. da procurar – ensemen cun la Confederaziun – per in'extensiun dals criteris da promoziun per projects d'investiziun (à fonds perdu, emprests, garantias) durant in temp limità, per che las interpresas che vulan far investiziuns na vegnian betg franadas tras corona, per ch'ellas hajan, senza retard, in effect stabilisat grazia ad investiziuns en las regiuns e per ch'ellas garanteschian/mantegnian resp. stgaffeschian uschia perspectives, plazzas da lavur, valorisaziun e valurs.

Tavau, ils 18 da favrer 2021

Maissen, Engler, Casty, Berther, Bettinaglio, Brunold, Buchli-Mannhart, Caluori, Cantieni, Casutt-Derungs, Caviezel (Cuir), Clalüna, Cramer, Deplazes (Rabius), Derungs, Ellemunter, Epp, Felix, Florin-Caluori, Föhn, Geisseler, Hardegger, Horrer, Kohler, Kunfermann, Lamprecht, Loepfe, Müller (Favugn), Papa, Perl, Preisig, Rettich, Ruckstuhl, Sax, Schmid, Schneider, Tanner, Ulber, Widmer (Favugn), Wilhelm, Zanetti (Landquart), Altmann, Bürgi-Büchel, Collenberg, Decurtins-Jermann, Pajic